

22/10/2003

Ucapan PM bukan untuk lagakan Islam, Yahudi

reports on "Dewan Rakyat" by Misiah Taib

KUALA LUMPUR: Kabinet dan rakyat menyokong penuh kenyataan Datuk Seri Dr Mahathir Mohamad mengenai kaum Yahudi yang dibangkitkan Perdana Menteri dalam ucapan pembukaannya pada Sidang Kemuncak ke-10 Pertubuhan Persidangan Islam (OIC), minggu lalu.

Menteri Pertahanan yang juga Naib Presiden Umno, Datuk Seri Najib Razak, berkata: "Apa yang diluahkan Perdana Menteri adalah satu realiti yang selama ini telah disembunyikan atau tidak berani dilafazkan oleh orang lain."

Pada sidang media di lobi Parlimen, semalam, beliau berkata ucapan Perdana Menteri juga seimbang, rasional dan bertujuan mengelak pertembungan atau konflik antara orang Islam dan bukan Islam serta antara orang Islam dan Yahudi.

"Perdana Menteri kata tidak wajar untuk kita menggunakan emosi dan tidak ada faedahnya kita menggunakan cara keganasan. Lebih baik kita memikirkan strategi dan menggunakan akal," katanya.

Beliau berkata, apa yang ingin didedahkan Perdana Menteri bukanlah hendak melagakan orang Islam dan Yahudi, sebaliknya masalah orang Palestin yang telah dirampas tanah mereka dan dizalimi.

Sementara itu, Timbalan Menteri Pertahanan, Datuk Mohd Shafie Apdal, berkata Angkatan Tentera Malaysia (ATM) kini menempatkan dua batalion tentera mengandungi 1,500 anggota di sempadan Sarawak/Kalimantan bagi membanteras kegiatan penyeludupan dan kemasukan pendatang tanpa izin.

Beliau berkata, selain rondaan di darat, operasi juga dilakukan di kawasan perairan dan ruang angkasa oleh Tentera Laut Diraja Malaysia (TLDM) dan Tentera Udara Diraja Malaysia (TUDM).

"Operasi juga dilaksanakan bersama Polis Diraja Malaysia (PDRM) terutama untuk membanteras kegiatan penyeludupan dan pendatang tanpa izin," katanya menjawab soalan Richard Riot ak Jaem (BN-Serian).

Menjawab soalan tambahan Riot supaya rakyat tempatan diberi peluang menyertai Askar Wataniah berikutan mereka lebih arif dengan laluan atau 'lorong tikus' yang digunakan penyeludup, Mohd Shafie berkata, ini memang selari dengan apa yang sedang dilaksanakan kementeriannya sekarang.

Kementerian itu, katanya, sedar mengenai kehadiran lorong tikus dan inilah yang menyebabkan pihaknya melatih mereka yang tinggal di kawasan berhampiran serta lebih arif dengan kegiatan penyeludupan di kawasan masing-masing, untuk membantu memerangi masalah berkenaan.